



**Ethica Amoris, Sive Theologia Sanctorum, Magni  
Præsertim Augustini, Et Thomæ Aquinatis**

Circa Universam Amoris & Morum Doctrinam, Adversus Novitias Opiniones  
Strenuè propugnata, Et In Materiis Principaliter Hodie Controversis  
Fundamentaliter discussa

De Externis Regulis Amoris Et Morum, Legibus Utique, ac Præceptis  
Virtutum Theologicarum, & Cardinalium, necnon Decalogi & Ecclesiae -  
Libros Vndecim Complectens

**Henricus, de Sancto Ignatio**

**Leodii, 1709**

Caput XXVI. Modus quo hæretici convertendi sunt ad Religionem  
Catholicam, seu Romanam.

---

[urn:nbn:de:hbz:466:1-73203](https://nbn-resolving.org/urn:nbn:de:hbz:466:1-73203)

334 Octavum argumentum petitur ex supradictis vaticiniis tam Prophetarum sanctissimorum, quam Sybillarum, in Gentilitate famosissimarum, à quibus non solum Christus Christianique mysteria, ut supra, sed & Ecclesia ipsius, florentissimisque Ecclesiae status pluribus antè saeculis praedicta, atque deinde ad litteram impleta sunt. Quae cum nec humano, nec diabolico spiritu praevidere potuerint; solo ergo divino spiritu, seu prophetiae dono, ea praeviderunt, juxta illud, *Annuntiate quae ventura sunt, & sciemus quia dii estis vos.* Deus ergo per vaticinia illa testimonium reddidit veritati Christianae religionis, uti pluribus ostendit D. Augustinus 17. Civit. 15.

335 Alia ad idem argumenta proferri possunt; sed allata sufficiunt ad sincerum veritatis amatorem convincendum. Simul enim sumpta, tam efficacia sunt, ut Christianam religionem evidenter credibilem reddant, nec divina providentia, de gloria sua, deque hominum salute curam habens, permittere possit falsam religionem tot & tam credibilibus argumentis, tantisque signis & virtutibus confirmari, quibus si homines forent decepti, deceptionem suam merito tribuere possent Deo decipienti. Absit autem quod tantus gloriae suae zelotes patiatur se jure deceptorem dici: cum sit veritas falli, & fallere neficia. Denique, per argumenta haecenus deducta, Christiana religio praeter ceteris longe credibilissima apparebit, si illius Author, excellentia, sanctitas, propagationis modus, effectus, &c. cum aliarum sectarum Authoribus, qualitate doctrinae ipsorum, propagationis modo, effectibus, &c. conferantur. Pro nulla enim alia secta concurrunt tam credibilia argumenta, nec ulla alia religio tam sanctam tradit doctrinam, nec talem habuit propagationis modum, tam mirabiles effectus, tantam confirmationem per miracula, vaticinia, &c.

336 Nostri quidem haeretici, Lutherus, Calvinus, &c. suos errores miraculis confirmare conati sunt; sed per imposturam, prout manifestè apparuit, & divina providentia detexit. Dum enim impostoriè voluerunt de mortuis facere vivos, de caecis videntes, &c. de vivis econtra fecerunt mortuos, & de videntibus caecos. Cumque daemones à corporibus obiectis expellere tentaverunt, ab ipsis verbera, & subannationes reportaverunt, uti verissimè Historiae testantur. Unde ipsos irridens Erasmus diatrib. de lib. arb. *Non credebatur* (inquit) *Apostolis, nisi miraculis adstruxissent suam doctrinam: nunc quilibet sibi postulat credi, se habere spiritum Evangelicum, licet, ut addit, nullus vestrum adhuc extiterit, qui vel equum claudum sanare potuerit.*

## CAPUT XXVI.

*Modus quo haeretici convertendi sunt ad religionem Catholicam, seu Romanam.*

Sicut Pagani & Judaei ad Christianam religionem perducendi sunt, ipsis ostendendo, solam Christianam inter omnes religiones esse veram; sic haeretici ad religionem Catholicam, seu Romanam convertendi sunt, ipsis ostendendo solam Catholicam, seu Romano Pontifici obedientem, inter omnes religiones, quae Christiano nomine recensentur, esse veram. Id verò ostendendum est duplici genere argumentorum, ex quibus priora demonstrant veritatem Romanae religionis; posteriora omnium aliarum falsitatem.

## CAPUT XXVII.

*Romanae religionis, seu Ecclesiae veritas ostenditur, ex eo quod habeat notas verae religionis, manifestaque signa credibilitatis.*

Dixi religionis, seu Ecclesiae: cum enim Ecclesia sit Congregatio fidelium, ut S. Thomas ait 3. p. q. 8. a. 4. ad 2. ibi vera est religio, ubi vera est Ecclesia, ubi scilicet Congregatio est verè fidelium, id est hominum veram fidem, cultumque veri Dei profitentium. Si ergo Romana Ecclesia est Ecclesia vera, religio ipsius est vera.

Si quaeras 1<sup>o</sup>. quid sit Ecclesia Romana? Respondeo esse Congregationem fidelium, veram fidem Christianam profitentium, iisdem Sacramentis participantium, uniusque visibili Christi in terris Vicario, Romano Pontifici obedientium. Ex qua definitione patet, quod nec Pagani, nec Turcae, nec Judaei sunt de Ecclesia Romana; quia fidem Christianam non profitentur; nec haeretici, quia non profitentur veram; nec schismatici, quia non obediunt Romano Pontifici.

Si quaeras 2<sup>o</sup>. quanam sint notae verae religionis, seu Ecclesiae?

Respondent quidam haeretici, verae Ecclesiae notam aliam non esse nisi veritatem. Sed contra, 1<sup>o</sup>. notae verae religionis notiores esse debent verae religionis, id est cognitu faciliores. Veritas autem religionis notior, seu cognitu facilior non est vera religio, ut per se patet.

2<sup>o</sup>. Veritas religionis est de essentia verae religionis. Essentia autem verae religionis per suas proprietates, seu proprias dotes discernenda est. Cum enim essentiae rerum per se ipsas non discernantur, aliunde melius discerni non possunt, quam ex earum proprie-